

Piffissaq piniarfiusoq tamaat isigalugu nalunaarutip aalajangersagaasa iluini, umimmannik ukiukkut piniarneq, taamaaliornermi assersuutigalugu Naternami pisassiissutit ukiukkut pisarineqanngitsoortut ukiukkut iluaqutigineqarsinnaasunngorlugit pinissaat, qulakkeeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Kristian Jeremiassen, Inuit Ataqatigiit)

Akissuteqaat

(Aalisarnermut Piniarnermullu Naalakkersuisoq)

Siullermeerneqarnera

Siunnersuuteqartoq Kristian Jeremiassen, Inuit Ataqatigiit, piffissaq piniarfiusoq tamaat isigalugu nalunaarutip aalajangersagaasa iluini, umimmannik ukiukkut piniarneq, taamaaliornermi assersuutigalugu Naternami pisassiissutit ukiukkut pisarineqanngitsoortut ukiukkut iluaqutigineqarsinnaasunngorlugit pinissaat, qulakkeeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuummut Naalakkersuisunit qutsavigissavarput.

Umimmannik pisassat amerlassusissaat piniarnerullu sivisussusissaa susassaartunut assigiinngitsunut tusarniutigineqareernerata kingorna ukiut tamaasa aalajangerneqartarpoq aammalu ukioq manna pisassat piffissarlu aalajangiunneqarpoq. Tamatumunnga atatillugu ilisimatitsissutigisinnaavara Naternami umimmannit pisassiissutigineqartunit, 2021-mi aasap ukiallu ingerlanerani pisarineqanngitsoortut, 2022-mi ukiumut nuunneqarnissaat aalajangiunneqareermat taamaalilluni siunnersuutigineqartoq piviusunngortinneqareerpoq aammalu periuseq tamanna siunissami atorneqassaaq allatut aalajangertoqarnissaata tungaanut..

Neqissaqarniarneq eqqarsaatigalugu Naalakkersuisunit imminut pilersornerup annertusarnissaa pingaartinneqarpoq aammalu tamanna Suleqatigiinnissamik Isumaqatigiissummut pingaarnertut inissinneqarnikuvoq.

Kalaallit Nunatsinni neqissaqarniarnermi umimmaat piniagassani iluaqutigilluakkatta ilagaat. Inuussutissarsiutigalugu piniartut, sunngiffimmi piniartut aammalu tammajuitsussarsiniarlutik piniartartut ukiut tamaasa Kalaallit Nunaanni umimmaat arlalissuit pisarisarpaat. Umimmaat neqissaqarniarneq aammalumi amii, qiviui, nassui, tunnui kukiffaalu assigiinngitsunut atorluarniarlugit, inuussutissarsiutigalugu sunngiffimmilu piniartunit piniarneqartarput.

Tamanna tunngavigalugu Naalakkersuisut sinnerlugit innersuussutigissavara siunnersuut akuerineqassasoq.